

1 Jon

Kumaen San Ru

1 ¹Kumaen san ru a fun lo mok yen go ipalu yan, tamol mok igo ilasa ya. Inſen awan lo kumaen san ru ilasa dugo maŋ malon ak, malama lo mok mile yak, agod tinin dam banima nam mabi ak, an mi maŋ niŋen o miŋiŋeŋ da. ²Kumaen an inſen mi kuai tem ikubiai panama dugo mile ya. Rumok, kumaen pempem san an imug mi Bai da dumado na yan kuai isi a. Kumaen an maŋ malama nam mile tag gamu en maŋ an niŋen o mi mabol dop alon a. ³Mel e maŋ mile dugo malon en murupaian da. An lo aŋ maŋ da sisem idsad madok an kisaek mi yen yau a. Agod maŋsama madok man Bai da, agod inanen Nanun Jesus Kristus da mumado da. ⁴Maŋ girek e migire panaŋ den lo idsad yousai awan isa wa.

Ilalaŋ lo tator san ru

⁵Ru a in awan lo malon an mabol alon da. Anut mi in ilalaŋ. In lo tidom tubun ta yen man tia geig a. ⁶Id igo tabol da, id in da madok kisaek mi tumado da, ak man id tidom tubun lo tator tap, ru raek tabol da, agod idsad madok an ru rumok san dal ta iri na da. ⁷Gug in ilalaŋ lo itor dak ago mi id dam tator tap, id anek anek sisem ilod kisaek mi tumado wa. Agod inanen Nanun Jesus san dar an mi lo idsad aupasek fidian isasi panad go ikok tilasa ya. ⁸Id aupasek amad tia yak tabol tap, sed ilod irawad da, agod ru a rumok an id ilod lo ta yen na da. ⁹Ak man in awa urek san tamol, agod itaot geig a, amaiak niŋen o id idsad aupasek an kuai te tabol ilasa tap, idsad aupasek an fidian isasi yau dop, ilod lo kagin itaot tia yan fidian ipasi dop ikok tilasa wa. ¹⁰Gug id aupasek ta tigane na yak tabol dop man, id in sewak tamol igo won tigane da, agod inanen ru an id ilod lo aben ta yen man tia ya.

Kristus idsad binawek

2 ¹O ŋai nanug muroug, aŋ au apas amoi o ru en ŋigire da. Gug ta in au ipas tap man, id binawek tamol amad da ya. Tamol an Jesus Kristus itaot mok a. In ibinawad san o Bai naon na itur da. ²Idsad

aupasek niŋen o Anut ilon wananan da. Ak man Kristus sen inŋsan materŋ lo Anut ilon ago iganeg ibubarus a. Id niŋed o mi tia ya, tia, tamolpein a tan titin fidian lo dumado dugo inŋ niŋen o ilod rumok tap, sad aupasek an dam isasi yau a. ³Id inŋsan ru kubiaenŋ ibol talonŋ an mi turi tupani tap, dal an lo na id ka talonŋ ak id rumok mi Anut talonŋ a. ⁴Gug ta inŋ ibol, “Ŋai Anut ŋalonŋ a,” ago gug inŋsan awan kagin ta ipani na dan, inŋ sewak tamol, agod Anut san ru rumok ak inŋ lo man tia ya. ⁵⁻⁶Ak man talpein a Anut san ru a kagin ipani dan, rumok, inŋ lo Anut san ilo panek italbusip tubun geig a. Ta inŋ Anut da dumado dak ibol dan, dal kisaek a Jesus itor an lo mi inŋ dam itor a. Dal an lo mi id talonŋ ak, rumok, id Anut da tumado da.

⁷O turag muroug, gamu ru kubiaenŋ e niŋire den man foun tia ya. Tia, ru kubiaenŋ en wagam a, nek a fun lo mok alonŋ ama ya. Ru an man fun aŋ alonŋ la ya. ⁸Ago bo man ru kubiaenŋ en man ibol foun ak onŋ a. Ru kubiaenŋ an san nuŋon man Kristus lo tile da, agod aŋ lo dam maŋ mile da. Man dugo, tudom tubun itout yau dugo ilalaŋ mok an kuai isi da. ⁹Ago yak niŋen o talpein ta inŋ ilalaŋ lo itor dak ibol gug turan ta ile saian tap, inŋ tidom tubun lo mi imado da. ¹⁰Talpein a inŋ turan niŋen o imat dan inŋ ilalaŋ lo imado da. An niŋen o mel saian ak ta lo yau idu san inŋ tinin lo yen man tia ya. ¹¹Gug tamol ta turan ile saian dan inŋ tudom tubun lo imado itor da. Ago yan lo malan tidom tubun dop dal inŋaonŋ a.

¹²Nanug muroug, inŋ yaŋan o, aŋsam aupasek ipare idu yak niŋen o ŋai aŋsam na girek en niŋire da. ¹³O tamag muroug, inŋ fun lo imadog ipalu yan alonŋ uyan ak niŋen o ŋai aŋsam na girek en niŋire da. O aŋ pinein foumi, Satan san dabai abi idu yak niŋen o ŋai girek en niŋire panaŋ da. O nanug muroug, aŋ Bai alonŋ ak niŋen o aŋsam na girek en niŋire da. ¹⁴O tamag muroug, aŋ man inŋ fun lo mok imadog ipalu yan alonŋ uyanan ak niŋen o ru en niŋire da. O aŋ pinein foumi, girek en aŋsam na niŋire den man fun igo ya, aŋ dabai amam da, Anut san ru aŋ lo yen da, agod Satan san dabai abi idu ya.

¹⁵Aŋ tan en san madok inŋanen filian da niŋen o yaes ifunaŋ amoi. Ta inŋ tan en san madok niŋen o imat tap, Bai niŋen o imat dan, inŋ lo man tia ya. ¹⁶Man dugo, kagin fidian tan en lo yen dan igo ya, tinik san ilo imasa san kagin, mala sek san kagin, agod se pitianoŋ kagin tan en san tamolpein digane dan, fidian Bai san nag ta ipalu na da, tia, an tan en san mel mi a. ¹⁷Tan en inŋ tamolpein sad ilo masa da ditout diau da. Ak man talpein ta inŋ Anut ilon ibol dak ago mi igane dop man, pempem imado yau a.

Kristus san ager

¹⁸Nanug muroug, saen wadan ipalug sumeik da. Nek ibol aŋ ru en dubol dugo alonŋ na yak ago, Kristus san ager ipalu wo da, gamu en

Kristus san ager wei kasik dilasa yan lo tile talonj a. Amaiak ningen o id talonj uyan ak saen wadan sumeik ipanad da. ¹⁹Tamol malan an idsad doup lo dilasag diau a. Inj dubusawad man fun inj id muroud tia ya. Aria id muroud ak man ta dubusawad na wa. Gug id dubusawad an lo kuai tem tile talonj ak, an id muroud tia ya. ²⁰Ak man Urgun injsan dabai an lo ikulmaek idug yen da, an lo an fidian Anut san ru rumok an alonj a. ²¹An ru rumok ta alonj na yak ningen o naj girek en ta njigire na da. Tia, an ru rumok alonj la ya, an ningen o anjsam na njigire ipalu da. An alonj ak ru sewak fidian an ru rumok ak muroun tia ya. ²²Ru sewak an enti awan lo ilasa dak i? Tamol a Jesus inj Anut san pilianek tamol yanjak “Kristus” dubol dan ningen o “tia yak” ago ibol dan, tamol an Kristus san ager. Tamol naok ago yak inj Bai Nanun da nijedi wo dam imoi a. ²³Ta inj Nanun imoi dop man inj Bai san tia ya. Gug ta inj Nanun ningen o ilon rumok ak ago ibol tap, inj Nanun san muroun mi tia ya, tia, Bai dam injanen muroun a. ²⁴Ru a fun lo alonj an ilom lo aganep yen a. Ago agane tap, an Nanun inj Taman da urarum dadi amado wa. ²⁵Agod injsan promis ipanad en igo ya, kumaen pempem yen yau san an ipanad a.

²⁶Tamol dirawanj o digane dak ningen o girek en njigire pananj da. ²⁷Ak man Urgun san dabai ikulmaek idug anjane yan, an lo yen da. An ningen o talpein mel foun ak ta ipitejananj san tia ya. Man dugo, Urgun san dabai anjane yan manjau fidian ipitejananj da. An man rumok a, ta sewak na ya, amaiak ningen o nek ibol an ipitejananj igo wonj Kristus da amado wa.

Enti inj Anut nanun muroun

²⁸O nanug muroug, an inj da amado wa. Ago tap, saen inj kuai te ilasa dop id inj da tinjinenj o ta tarer na wak, agod miai ifunad dop tasuk tamul san dam tia ya. ²⁹Inj itaot geig ak an alonj tap, mel en dam alonj a, tamol a kagin uyan ak mi igane dan inj Anut lo foun ilasa ya.

3 ¹Alonj, Anut dugo mok id nijed o imat di? Injsan ilo panek id nijed o man tubun geig a! Man dugo, id Anut nanun muroun ago ibol da. Id nek ago mi a. Tan en san tamolpein id ta dulonj na yan fun man inj Anut ta dulonj na ya. ²O turag muroug! Id gamu Anut nanun muroun tumado da. Gug id mitep dugo tilasa wan ta talonj uyan na da. Gug id mel en talonj ak, saen Kristus kuai isi dan, id tilasap inj ago mi wa. Man dugo, inj naon tinin tile ago mi tile wa. ³Talpein mel an ningen o Kristus tinin igane pani dan injsen iganeg gun ilasa ya, nek ibol Kristus injsen gun ago mi a.

⁴Ta inj au ipas tap, inj Anut san kubiaen ipilali a. Rumok, aupasek man igo ya, tamol kubiaen paen na ta imado na dak san kagin igo ya. ⁵An alonj ak, Kristus tamolpein sad aupasek ipasi wo ipalu ya. Agod inj lo aupasek ta ule san tia geig a. ⁶Ago yak ningen o talpein enti Jesus Kristus da dumado dan au ta ipas na da. Gug ta inj au ipas onj dan, inj Kristus ta

ile na yak, agod dam ta ilonj na ya. ⁷O nanug muroug, mel en ninen o tamolpein eil afu dop dirawanj banau! Ta inj kagin itaot igane dan, inj mi itaot a. Ibol Kristus itaot imado dak ago mi inj dam imado da. ⁸Talpein enti aupasek igane onj dop man, inj Satan san muroun mi a. Man dugo, Satan inj fun lo mok go ipalu yan au ipas na ya. Ak man Anut Nanun kuai isi an fun man, Satan san banin aban isubari idu wo ipalu ya. ⁹Tamol dugon Anut lo foun ilasa yan inj au ta ipas na da, man dugo, Anut san bunun inj ilon lo yen da. Rumok, inj aupasek ta igane yau onj na wa, man dugo, Anut lo foun ilasa ya. ¹⁰Ru en tamol dugon Anut nanun ago dugo, tamol dugon Satan nanun, an fud ifulaleg kuai tem tile da. Talpein a kagin uyan ak ta igane na yan inj Anut san muroun tia ya. Agod ta inj tein ninen o ta imat na dan inj dam Anut san muroun tia ya.

Nug ninen o amat a

¹¹Ru en gubak mi mok go ipalu yan alonj a, id nug ninen o tamat a. ¹²Id Kein tutujanani tamoi a. Inj man Satan san muroun mi a, an lo injsen tein Abel ifunig imat a. Ata wo ifuni ak i? An fun man injsan kagin naok naok saian a, gug tein san kagin fidian itaot, amaiak ninen o ifunig imat a. ¹³Teig taog, amaiak ninen o tan en san tamolpein dilianj saian geig dan, ninen o yaes ta ifunanj na dop bubem ta irut na wa. ¹⁴Id talonj ak materj san dal tibiseig, kumaen san dal lo tiladu ya. Id teid taod ninjedi wo tamat an lo talonj ak, an rumok a. Agod ta inj turan ninjedi wo ta imat na dan materj san tuon yabituani onj da. ¹⁵Talpein inj turan ile saian tap, tamol an inj tamol ifuni imat ak igo wonj a. Agod an alonj ak, talpein a tamol ifuni imat an kumaen pempem san an ilon lo yen man tia ya. ¹⁶Kristus id o inj tinin kumaen ak gigin na igane yan lo, id nug ninen o tamat san dal an ikubiai panad o igane ya. Fun an ninen o id dam turad muroud o ago mi tigane wa. ¹⁷Talpein tan en san filian anda yan injsan turan mel ta lo katukan dugo ile gug ilon ifutani tap, ilo panek Anut san na ipalu dan inj ilon lo yen dak i? Man tia geig a! ¹⁸Nanug muroug, id nug ninen o tamat dan awad mi ru ibol da, gug an san nujon tia yak ago ta tigane na wa. Tia, idsad kagin kagin lo dam ago tigane mok dop man, nujon ilasa wa. ¹⁹⁻²⁰Dal an lo id talonj ak id man ru rumok ak san muroun a. An ninen o saen id ilod ibiad tadu dan, Anut naon na id ilod san urer an ka kute ibol a. Man dugo, Anut injsen idsad ilod irinjan geig a, agod inj mel fidian ilonj uyanan a. ²¹Turag muroug, idsiganed ilod ta ibiad tadu na tap, id Anut naon na tugudani wo sumeik ka tupani dop, an lo id ta tarer na wa. ²²Agod mel dugon ninen o tugudani dan, an mi ipanad a. Man dugo, injsan ru kubiaenj kagin tupani dugo ilon ibol ak ago mi, id iri panim tigane da. ²³En man injsan ru kubiaenj, id inj Nanun Jesus Kristus injsan yanan lo ilod lo rumok a, agod nug ninen o tamat a, nek ibol ru kubiaenj ipanad ago mi tigane wa. ²⁴Talpein a fidian inj Anut san

ru kubiaen kagin dupani dan, in Anut da dumado da. Agod Anut dam in dida dumado da. Inanen Urgun ipanad an lo id talon ak, in id da tumado da.

4 ¹Turag muroug, an ur fidian sad ru ilom lo ta rumok na wa. Tia, ur an sad ru abitinae ale gup a, kabelan ur an Anut san boi, tia, Satan san boi, an an ale alon uyan a. Man dugo, profet sewak wei mi aben fidian lo dufufurak go diau a. ²Ur a Jesus Kristus in tamol mok on tan na ipalu yak ago dubol dan, in Anut san a. Dal an lo mi an Anut san Ur ka ale alon a. ³Ak man ur a Jesus Kristus in tamol mok on ta ilasa na yak ago dubol dan, in Anut san tia ya. In man tamol a insan yanak “Kristus san ager” dubol dan san ur mi a. Ur an ipalu wo ru an alon se yan, gamu tan en lo imado la ya.

⁴O nanug muroug, an Anut san muroun a, agod an profet sewak adi arijanai a. Man dugo, Ur an lo yen dan insan dabai man, ur a profet sewak adi lo yen dan san dabai irijani a. ⁵Profet sewak adi in tan en san muroun mi a, amaiak nijen o ru a dubol dan, nek tan en san mi a. An lo dop tan en san tamolpein kukudod dugurep in awad dulong da. ⁶Gug id man Anut san muroun a. Ago yak nijen o talpein a Anut ilon an, id awad ilon da, ak man a in Anut san muroun tia yan, id awad ta ilon na da. Dal an lo dop ur dugon rumok san, agod ur dugon sewak san dam ka kuai tem tile talon a.

Anut imug id nijed o imat a

⁷O turag muroug, id nug nijen o pempem tamat a, man dugo, Anut insan bunun man ilo panek san fun mok a. Talpein a ilo panek aman da yan, in Anut lo foun ilasa ya, agod in Anut ilon da. ⁸Gug talpein a ilo panek an tia yan, in Anut ilon man tia ya. Man dugo, Anut man insen ilo panek mok a. ⁹Anut insan ilo panek a id lulunad lo kuai tem ikubiai panad an san dal igo ya. Inanen Nanun kisaek o lian amaiak tan en lo iganeg ipalu ya, an lo dop insen tinin lo kumaen tumado san tinane wa. ¹⁰Ilo panek e nai nijen o nabol den igo ya. Id malan malan Anut nijen o ta tamat na ya, tia, in imug id nijed o imat a. Agod Taman san ilo wananan a idsad aupasek igane ilasa dan, Nanun insen yabiani wo iganeg ipalu ya. ¹¹Turag muroug, Anut id nijed o ago imat tap, id dam nug nijen o tamat a. ¹²Tamol ta in Anut ile man tia ya. Gug id nug nijen o tamat tap, Anut id da tumado wa, an lo dop insan ilo panek id lo yan italbusip nunon ifu wa.

¹³Id igo talon a, id in da tumado da, agod in dam id da tumado dan, rumok a. Man dugo, inanen Urgun titin aenta inaneg id ipanad a. ¹⁴Agod id malad lo Anut inanen Nanun idinig tan en san tamolpein patud ipasi wo ipalu yan tile ya, agod an nijen o tamolpein aenkadi tabol dulong da. ¹⁵Talpein a Jesus in Anut Nanun mok ibol ilasa dan, Anut in da dumado

da, agod iŋ dam Anut da dumado da. ¹⁶Dal an lo id Anut san ilo panek ipanad dan taloŋ a, agod id ilod lo rumok a. Anut iŋ mi ilo panek. Ago yak niŋen o talpein a ilo panek aman da yan, iŋ ilon lo Anut imado da, agod Anut ilon lo iŋ dam imado da. ¹⁷Dal an lo ilo panek id lo yen dan italbusip itaot geig a. An lo dop bitinaek san nal lo id Anut naon na tatur san niŋen o ta tarer na wa. Man dugo, tan en lo id man, nek iŋ igo mi id dam ago mi a. ¹⁸Ilo panek man tinin rurek an tia ya. Tia, ilo panek itaot geig an ilo irer ikudip patun fo ilasa da. Man dugo, ilo irer man naon panek san mel mi a, an lo dop talpein a irer dan, ilo panek san kagin lo tamol itaot mok ta ilasa na ya. ¹⁹Id aenta niŋedi wo tamat san fun man iŋ imug id niŋed o imat a. ²⁰Talpein ta igo ibol, “Ŋai Anut niŋen o ŋamat da,” gug turan ta ile saian tap, iŋ sewak tamol. Man dugo, iŋ turan a ile yan niŋen o ta imat na tap, iŋ Anut a ta ile na dan niŋen o imat san tia geig a. ²¹Agod taida mi, iŋsen ru kubiaen en ipanad a, ta iŋ Anut niŋen o imat dan turan dam niŋen o imat da.

Id Anut Nanun niŋen o ilod rumok a

5 ¹Tamolpein ensauta a Jesus iŋ mi Kristus an ilod lo rumok tap, iŋ Anut nanun muroun. Agod tamolpein ensauta a taman niŋen o dumat dan, iŋanen nanun dam niŋen o dumat da. ²Id dal an lo Anut iŋanen nanun muroun niŋedi wo tamat dan taloŋ da, id Anut niŋen o tamat dop iŋanen ru kubiaen dam turi tupani da. ³Id Anut niŋen o tamat dan nek ema ya, id iŋsan ru kubiaen turi tupani da. Agod iŋsan ru kubiaen turi san man pasauman a. ⁴Man dugo, tamolpein a Anut lo dilasa yan fidian iŋ tan en san kagin saian ak diabi idu da. Agod ata mel ta dabai aman da yak lo id tan en san dabai ka tabi idu wak i? Mel an man idsad ilo rumok mi a. ⁵Enti tan en san dabai yabi idu san ilon i? Tamol a Jesus iŋ Anut Nanun mok ak ilod lo rumok dan, nek ama ya.

⁶Tamol e niŋen o tiŋiŋen den, Jesus Kristus, you san dal, agod dar san dal dam lo ipalu ya. Fulanek lo mi ta ipalu na ya, tia, iŋsan maten san dar lo dam ipalu ya. Agod Urgun sen ru an kuai tem igane ya. Man dugo, mel e uraru en, Urgun iŋ ru rumok ak da, man sisem naod kisaek a. ⁷⁻⁸Mel utol en Kristus niŋen o kuai tem dubol ilasa da: Urgun, you, agod dar. An lo mel utol an dutumanig awad kisaek go ru an dubol ilasa da. ⁹Ru ta tamol adi kuai tem digane ilasa yan id ilod lo rumok tap, id ru a Anut ibol go taloŋ an dam ilod lo rumok a. Man dugo, Anut san ru an tamol sad ru iriŋani geig a. Agod Anut iŋsen ru e irupaiaid den, iŋsen mi iŋanen Nanun niŋen o kuai tem ibol ilasa ya. ¹⁰Talpein a Anut Nanun niŋen o ilon rumok dan, iŋ buben lo ru a Anut ibol ilasa dan yen da. Gug talpein iŋ Anut san ru an ilon lo ta rumok na yan, iŋ Anut sewak tamol igo woŋ igane da. Man dugo, Anut iŋsen Nanun niŋen o ru an ibol a, ak gug talpein an ilon lo ta rumok na ya. ¹¹Ru a Anut ibol ilasa yan san fun

igo ya. Anut id kumaen pempem san ipanad a. Agod kumaen an ijanen Nanun san banin lo yen da. ¹²Talpein a Nanun yabituani dan, kumaen pempem san dam yabituani da. Gug ta iŋ Nanun ta yabituani na dan, kumaen an iŋ lo tia ya.

Ru wadan

¹³Aŋ Anut Nanun yaŋan niŋen o ilom lo rumok an, girek en ŋigire panaj da. Agop aŋ kumaen pempem san aŋane la yan alon a. ¹⁴Id talon ak, saen id iŋ o tini ganei tiganeg tumosiai dan, mel a niŋen o iŋ tusumiani dan iŋsan ilobol an iri pani tap, id awad ilon mok a. ¹⁵Agod id mel dugon niŋen o iŋ tugudanip awad ilon dak rumok an talon tap, id mel en dam talon a, mel dugo yak niŋen o tusumiani dan iŋ ka ipanad a.

¹⁶Talpein ta iŋsan turan aupasek naok a ŋutun igane imat san tia yak an igane on dugo ile tap, iŋ niŋen o Anut igudani dop, fon kumaen ipani da wa. Aupasek naok ago yak mi niŋen o ŋabol da. Gug aupasek naon sen ak a ŋutud ifu dumat ak san dam yen da. Agod ŋai aupasek naok ago yak niŋen o aŋ agudani wo ta ŋabol na da. ¹⁷Kagin saiak saiak fidian an man aupasek a. Gug aupasek aenta a ŋutud ifu dumat san tia yak an dam yen da.

¹⁸Id talon ak enti a Anut lo ilasa yan au ta ipas na da. Man dugo, Anut Nanun iparfutani da, an lo dop Satan yabi ile san tia ya. ¹⁹Id mel en dam talon ak id Anut san muroun a, ak gug tamolpein a tan en san muroun mi dumado dan fidian, iŋ man Satan tuon lo dumado da. ²⁰Id mel en dam talon ak, Anut Nanun ipalug, an lo id Tubud a iŋ Tubud rumok ak talon san niŋen o maŋau ipanad a. Rumok, id a Tubud rumok ak iŋ da tumado dan, iŋsan Nanun Jesus Kristus dam ida tumado da. Kristus iŋsen mi man Anut rumok ak, agod iŋ lo dam kumaen an pempem yen yau da.

²¹O nanug muroug, tubud sewak ak mitilaedi niŋedi wo asau mi amado wa.